

EDIWỌRỌ KE MKPA NDUK KE UWEM

Ñwed Mbon Ephesus 2:1-22.

ỌYỌHỌ UKPEP-ÑKPỌ 401

Eke Ikpọ Owo

IKỌ IBUOT: “Ke mfọn ke ema enyaña mbufo oto ke mbufidem: erinyaña emi inyuñ itoho mbufo; edi Abasi ọnọnọ” (Ñwed Mbon Ephesus 2:8).

I Edida Owo Obukidem Ndomo Ye Eke Spirit

1 Paul emen idaha eke mmọ edude ke emi, odomo ye uwem eke mmọ ekedude ke akpa, Ñwed Mbon Ephesus 2:1-3; 4:18; Ñwed Mbon Colossae 2:13; 1 John 5:12; Ñwed Mbon Rome 8:2-6

2 Enye owut mfọn emi ekedade enyaña mmọ ye ntak emi ekenyañade mmọ, Ñwed Mbon Ephesus 2:4-7; Ñwed Mbon Rome 5:6, 8; 6:4, 5

3 Ekenyaña mmọ ke mfọn ekenyuñ ebọt mmọ enim enọ nti utom, Ñwed Mbon Ephesus 2:8-10; 1 Ñwed Corinth 3:9; 2 Ñwed Corinth 5:17; 2 Ñwed Timothy 1:9

4 Ekeda Iyip Christ ewuri ibibene emi akabaharede nnyin, Ñwed Mbon Ephesus 2:11-14; Ñwed Mbon Galatia 3:29; Ñwed Mbon Colossae 1:20

5 Jew ye mme Idut (Gentile), mmọ mbiba enyene usuñ eke esañade etiene Ete oto ke Christ, Ñwed Mbon Ephesus 2:15-19; 2 Ñwed Corinth 5:18; Ñwed Mbon Galatia 6:15; Ñwed Mbon Colossae 1:20-23; 2:14

6 Ebọp kpukpru mmọ eto kpa ke itiat ukot-ufọk kiet oro kpukpru enyuñ ekọri ọtọ kiet ewọrọ edi edisana itie-ukpono Abasi, Ñwed Mbon Ephesus 2:20-22; 2 Ñwed Corinth 6:16; Mme Hebrew 12:22, 23; 1 Peter 2:5; Eriyarare 21:14

SE EKPEPDE EBAÑA

Oruk Mkpa Iba

Paul ada owo obukidem odomo ye eke Spirit. Enye owut se nnyin idide ke uduot ye se nnyin idide oto ke mfọn. Ñkpọ ita edu ke owo, oro edi ikpohidem, ukpọn ye Spirit. Mkpa eke ikpohidem odu, mkpa ukpọn ke Spirit onyuñ odu. Mkpa ikpohidem edi edidianare ukpọn ye Spirit nsio ke ikpohidem. Mkpa ke Spirit adianare owo ọkpọn Abasi ke adañaemi owo osuk odude ke ererimbot; ndien edieke enye osuk akade iso ndidu ke oruk itie oro, enye eyenyene ubiomikpe emi osuñode ke nsinsi ufen, emi edide udiana mkpa. Mkpa eke Spirit oto ke ntak idiok-ñkpọ. Ntut-utọn Adam akada mkpa ikpohidem ye ukpọn etiene ubon owo. Mbemiso Adam anam idiok-ñkpọ, mkpa ikoduhe. Christ emenyene odudu akan mkpa ikpohidem ye eke ukpọn.

Ke ini nnyin ikerede ibaña mkpa ikpohidem, nnyin ikere ibaña asua eke odukde ufọk nnyin emen owo ima nnyin efep. (Kot ke 1 Ñwed Corinth 15:26). Nnyin ikut mkpa oro ke enyin ikpohidem nnyin. Nte ededi, mkpa nsinsi, me nsobo ke ukpọn, nnyin ikemeke ndikut enye ke enyin, edi Abasi okut enye onyuñ otim ọfiok nte enye ọdiokde. Enye ọkọdọn Eyen Esie man osio usuñ ndida mbọhọ enye. “Koro Abasi akamama ererimbot ntem, tutu Enye osio ikpọn-ikpọn Eyen emi Enye obonde ọnọ man owo ekededi eke ọbuotde idem ye Enye okutak, edi enyene nsinsi uwem” (John 3:16).

Jesus ọkọdọhọ ete: “Ekunyuñ efehe mmọ emi ewotde ikpohidem, edi mikemeke ndiwot ukpọn: edi ekam efehe Enye emi ekemedede ndisobo ukpọn ye ikpohidem ke hell” (Matthew 10:28). Abasi otim ọfiok abaña ndutuhọ eke nnyin ikutde ke ikpohidem, koro nnyin imokut nte ewetde ke ikọ Abasi ete, “Mkpa mbon ima Jehovah edi ñkpọ-uto ke enyin Esie” (Psalm 116:15). Edieke ukpọn ama akamana obufa onyuñ enen ke enyin Abasi, ke adañemi ikpohidem akpade, ukpọn efe ini kiet etiene Jehovah emi ọkọnọde enye, onyuñ aka iso odu uwem ke nsinsi. Jesus anam nnyin ibọhọ ufin idiok-ñkpọ ye mkpa onyuñ ọnọ nnyin uwem nsinsi. “Ke akpanikọ ke ndọhọ mbufo, owo eke okopde uyo Mi, onyuñ ọbuotde

idem ye Enye emi okodoñde Mi, enyene nsinsi uwem, inyuñ idukke ke ikpe, edi ama oto ke mkpa ebe oduk ke uwem” (John 5:24).

Eriset Ikpohidem Ke Mkpa

Ke ini ikpohidem akpade, edieke ukpoñ enende ke iso Abasi, onyuñ enyenede uwem ke Spirit, enye eyetoño nta akadiana ye ikpohidem, koro eriset eke ikpohidem odu. “Koro eyefri ukorowo, ndien eyenam mme akpa-mkpa eset nte mmọ midikemeke ndibiara aba, eyenyuñ ekpuhore nnyin. Koro mbiara ikpohidem emi enyene ndisine se midibiarake, ikpohidem mkpa emi onyuñ enyene ndisine se midikpaha. Ndien ke adañemi mbiara ikpohidem emi edisinede se midibiarake, ikpohidem mkpa emi edinyuñ esinede se midikpaha, adañoro ndien ke ikọ ediwořo osu, nte ewetde ete, Eda erikan emen mkpa. O mkpa erikan fo enye? O mkpa, ifot fo enye? (1 Nwed Corinth 15:52-55. Kot nko ke Nwed Mbon Rome 8:19-23).

Owo Inyene Ye Lazarus

Jesus etiñ onọ nnyin abaña owo inyene ye Lazarus. Mmọ mbiba ema ekpaña. Owo inyene ama odu uwem ke kpukpru nkoñ-nkoñ idaha ye uboñ ererimbot emi. Enye ama onọ ikpohidem esie kpukpru se enye ekekeme, edi ikekereke ibaña ukpoñ esie. Ndusuk, nte mmọ efen, enye ama odoho ete, “Ini ke ososuhọ kaña” Ema ebuk enye ke ofuri uboñ ye uyai emi ererimbot ekemede ndino. Edi Ikọ Abasi etiñ onọ nnyin ete ke hell, enye emenere enyin esie okut Lazarus anyan usuñ, ke ikpanesit Abraham. Owo inyene okut ukpoñ esie emi enye mkekereke nkpo ibaña nte odude ke hell atak ke nsinsi, onyuñ akpa ke Spirit.

Lazarus ekedi ubuene, edi enye ama ebeñe idem ndisobo ye Abasi. Ukpoñ esie ama odu uwem, kpa uwem nsinsi.

Ubon Abraham

Abasi ekemek ubon Abraham ndikabare ndi idut emi Eyen Esie edimanade ke esit, man ada erifak oşok ererimbot emi atakde.

Mme Jew ekekere ete mmimọ ikpoñ-ikpoñ inyene unen ndiduk ke Obio Uboñ Abasi. Oboñ okokot Paul onyuñ anam enye edi Owo-mbet, onyuñ otim ayarare Eti-mbuk onọ enye oyoho-oyoho ete ke enyene “owo ekededi eke onyimedede.” Oto ke mkpa Jesus Christ, ema ebererede usuñ mbom enim ata inwañ ndien kpukpru oruk owo emi etode mme Idut (Gentile) ekeme ndibe nduk edieke mmọ eyomde Oboñ.

Mbon Ephesus

Paul ama abiat ini ke Ephesus, idut mme Gentile, ndikwořo Ikọ Abasi. Ufoř Abasi emi ekesiakde do ama akabare edi kiet ke otu ikpo mkpoşon ebiet onọ Ikot Christ. Mbio-obio Ephesus emi ema esin idem mmọ ntoñtoñtoñ ke ukpono-ndem, edi ke ini mmọ ekekopde ukwořo-ikọ Paul, ekese mmọ ema enim ke akpaniko, ndien Spirit Abasi ama onọ ukpoñ mmọ uwem. Mmọ ema ekpaña esine ke idiok-nkpo edi ke emi, ema enam mmọ edu uwem ke Christ Jesus. Edimana obufa emi ama okpuhore uwem mmọ. Nnyin mbiba, Jew ye mme Idut (Gentile) isaña nte ekemde ye udon obukidem, ibohoke tutu nnyin imana obufa. Edi ke adañemi ema ekenyaña nnyin, enam udon nnyin okpuhore, ndien nnyin isañake ke udon obukidem edi isaña ke udon Spirit inam se inende ke enyin Abasi.

Edi ke Ephesus ke ekeboř akwa itie-ukpono Diana, kiet ke otu mme utibe-nkpo itiaba ke ererimbot. Mme anam-uso-sedibe (silver) ekeko inyene mmọ eto ke edinam mkpri mbiet Diana nnyam. Ata ediwak mbon Ephesus ema enim Eti-mbuk ke akpaniko ndien oro ama anam ubok-utom mme anam-uso-sedibe (silver) akabare owořo ikpikpu. Mmọ oro ema edaha eda esin ndutime ke obio ndien Paul ekenyene ndikpoñ obio oro (Kot Utom Mme Apostle 19).

Mbom

Edi ke akwa mbom Abasi ke Enye akama nnyin ke ini ikedide mme anam-idiok, ndien Enye anam Spirit nnyin odu uwem oto ke Jesus Christ, onyuñ anam Jew ye mme Idut (Gentile) etie ořo kiet ke mme

itie Heaven ke Christ Jesus. Eti-mbuk anam owo enyene ebuana ye kiet eken. Didie ke iba ekeme ndisaña kiet ye kiet ke mmọ midighe esit kiet? Nso ebuana ke uñwana enyene ye ekim? mme nso ediomi ke temple Abasi odiomi ye ndem?

Enyaña Ke Mfọn

“Itoho se mbufo enamde, mbak owo baba kiet edibure mbure” (Nwede Mbon Ephesus 2:9). Jehovah okonim ete akwa erinyaña emi edi ofuri-ofuri ke mfọn. Owo ama odomo ke mme emana, ke ofuri-ofuri ukeme ndinyaña idemesie nsio ke odudu idiok-ńkpọ, edi kpukpru okwọwọ ikpikpu. Oto ke Iyip Jesus, Iyip Esie ikpọn ke ekeme ndibiat idiok-ńkpọ nsio ke esit owo.

Edieke nti utom ekpenamde nnyin ikut unen ke iso Abasi, ediwak owo ekpenam oro ini kiet. Ikpenyeneke ufọn ndiyom Andinyaña. Abasi omokpono utom Eyen Esie “Owo eke enyenede Eyen enyene uwem oro; owo eke minyeneke Eyen Abasi inyeneke uwem oro” (1 John 5:12). Abasi okonim ete edinam nti utom ekpetiene uwem nnyin ke ini ema ekekpuhọre esit ndien nnyin iwọrọ ke mkpa iduk ke uwem. Edi se inade inọ Anditiene-Christ edi ndinam se inende ke isañ esie ke isọn. Nti utom edi se enamde ke unyime-esit oto ke esit emi amade Abasi, ndien idighe se enamde man owo okut unen ke ubok Abasi.

Erinyaña ukpọn nsio ke idiok-ńkpọ edi enọ emi Abasi ọnọde ererimbot emi, oto ke Ọbọn nnyin Jesus Christ; ke ntre, baba owo kiet ikemeke ndibure mbure nte ńkpọ eke enye enyenede se anamde ndifak uwem esie.

Edida Nsan-Nsan

Ekedọhọ ete ke mme Jew “ekpere” Abasi ke ntak Ibet ye mme ediomi ye ufañ eke mmọ ekenyenede ndikpere Enye nto ke mme enọ ye uwa iyip emi mmọ ekenọde Enye. Mme Idut (Gentile) ikenyeneke ufañ oro, ndien ema etiñ edian mmọ nte mmọ eke “edade nsan-nsan”.

Nte Iyip Jesus Christ okwọfiorọde oto idiok krọs oro, utom-obot ama akabare odu ke akwa ndutime, onyũ obumere ke ikañ-ikañ ifuresit. Mme Heaven ekabare ekim, ikpọ itiat esiaha, ndien mme udi ekubọre. Ikpehe Itie-ukpono Abasi ama asiaha mbak iba ọtọnọde ke enyọn osim isọn. Ema ekot mme Idut (Gentile) ete ebe eduk. “Mbufo mme Gentile, edara, . . . Yak kpukpru mme idut etoro Enye”. Jew ye mme Idut (Gentile) ekeme idaha emi ndisaña mkpere Odu-uwem Abasi oto ke Iyip Jesus Christ.

Owo idọhọke aba ite ke edi mme Jew “ekpere” inyũ idọhọke ke mme Idut (Gentile) “eda nsan-nsan”, edi kpukpru enyene ufañ ke Spirit ndisaña ńkpere Ete.

Itie-ukpono Jehovah

Jew ye mme Idut (Gentile) edi nditọ Obio Abasi, kpukpru mmọ enyũ edi eke ufok mbufotidem Esie. Mmọ enyene itiat ukot-ufok kiet, eke mme mbet ye mme anditiñ ntiñ-nnim ikọ; ndien Jesus Christ edi Etubom Itiat-inuk, emi edide usuñ emi mbiba esañade ediana ọtọ kiet kpa ke ufok kiet oro.

Edisana Spirit eneñere ada mmọ mbiba adian anam ekabare edi akwa itie-ukpono Jehovah. Utom eribọp ufok oro ikureke kaña, edi ke okori ke usen ke usen; ndien ke usen kiet, ke akpatre edisana owo Abasi ama ekebe oduk, ubọn Jehovah eyenọ uñwana ke itie-ukpono Abasi, ndien ndisana ikot Abasi eyeduño do. Eyeda erikan emen mkpa efep.

MME MBUME

- 1 Nte ukpọn ye ikpohidem eka iso edu ke mkpa ebede?
- 2 Mbon Ephesus eketie didie mbemiso mmọ ekop Ikọ Abasi?
- 3 Nte nti utom enyaña nnyin? Edieke minyañake, nso ńkpọ anam nnyin ikut mfọn ke iso Abasi?
- 4 Nso ńkpọ ikesin ubahare ke ufot Jew ye mme Idut (Gentile)?
- 5 Nte ibibene emi abaharede osuk ododu?
- 6 Nso oruk ufok ke eda edomo ye ndisana ikot Abasi?
- 7 Ke nso Itiat ukot-ufok ke ebọp Eti-mbuk edori ke esit?
- 8 Ke ini mkpa, ukpọn ye ikpohidem eka mmọn?